



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Sumáriu Kazu
Tribunál Distritál Oe-Cusse
Períodu Novembru 2017

Afirmasaun: Sumáriu Kazu tuirmai ne'e deskreve faktu sira no prosesu iha tribunál tuir JSMP nia monitorizasaun independente, no deklarasaun ne'ebé parte sira fó iha tribunál nia laran. Informasaun ne'e la reprezenta JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel sira. JSMP afirma katak sei la iha justifikasaun ba violénsia hasoru fetu.

A. Sumáriu prosesu julgamentu kazu iha Tribunál Distritál Oe-Cusse

1. Totál kazu ne'ebé JSMP monitoriza: 29

Tipu kazu	Tipu kazu	Númeru
Artigu 145 Kódigu Penál (KP) & artigu 2, 3, no 35 letra (b) Lei Kontra Violénsia Doméstika (LKVD)	Ofensa ba integridade fízika simples ho natureza violénsia doméstika no tipu ilísitu sira kona-ba violénsia doméstika	16
Artigu 145 (KP)	Ofensa ba integridade fízika simples	5
Artigu 207 (KP)	Kondusaun sein karta	3
Artigu 151 (KP) -	Ofensa korporal resíproka	2
Artigu 140 (KP)	Omisídiu negligjénte	1
Artigu 157 (KP)	Ameasa	1
Artigu 225 (KP)	Lahalo tuir obrigasaun alimentár	1
Totál	29	29

2. Totál desizaun ne'ebé JSMP monitoriza : 29

Tipu desizaun	Númeru
---------------	--------

Suspensaun ba pena prizaun nia ezekusaun - Artigu 68 KP	11
Omologa dezisténsia keixa	6
Pena multa tuir artigu 67 - KP	5
Absolve	3
Pena prizaun tuir artigu 66 Kódigu Penál	2
Pena admoestasaun tuir artigu 82- KP	2
Totál	29

3. Total kazu sira ne'ebé kontinua prosesu tuir JSMP nia monitorizasaun : 0

B. Deskripsaun sumáriu julgamentu ba desizaun kazu sira

1. Krime ofensa ba integridade fízika simples ho natureza violénsia doméstika

Nú. Prosesu : 0088/17.OESIC
 Kompozisaun Tribunál : Singulár
 Juis : Dr. João Ribeiro
 Prokuradór : Dr. Mateus Nesi
 Defeza : Dr. Calisto Tout
 Tipu pena : Pena prizaun tinan 1 suspende ba tinan 2

Iha 09 Novembru 2017, Tribunál Distritál Oe-Cusse prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu AdCB hasoru nia feen, iha Distritu Oe-Cusse.

Akuzasaun Prokuradór

Prokuradór akuza katak iha 07 Maiu 2017, maizumenus iha tuku 03:00 madrugada, arguidu atu baku lezada maibé la konsege tanba polisia kaer tiha arguidu. Kazu ne'e akontese wainhira arguidu ho lezada partisipa iha festa kazamentu no lezada dehan ba arguidu atu fila ona ba uma maibé arguidu lakohi.

Antes ne'e iha 26 Abril 2017, maizumenus iha tuku 22.00 kalan, arguidu basa dala 2 iha lezada nia hasan loos, tuku dala 1 iha lezada nia ibun no tebe dala 1 iha lezada nia kanotak. Aktu hirak-ne'e rezulta lezada sofre moras no ran sai hosi lezada nia ibun.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3 no artigu 35 letra (b) LKVD.

Produsaun ba prova

Iha julgamentu, arguidu deklara katak iha akontesementu ne'e arguidu basa deit dala 1 iha lezada nia hasan sorin loos no buti lezada nia kakorok mak liman kukun kona iha lezada nia kakorok no rezulta ran. Arguidu mos deklara katak arrepende ona nia hahalok, arguidu servisu hanesan funsionariu publiku ho rendimentu kada fulan US\$200.00 no iha oan nain 4. Arguidu promete katak sei la komete tan krime hasoru lezada iha futuru.

Iha parte seluk lezada kontinua konfirma faktus sira iha akuzasaun no lezada mos deklara katak deposite akontesementu ne'e diak malu kedas ho arguidu.

Alegasaun final

Prokurador haktuir katak arguidu provadu komete krime hasoru lezada no kazu violensia domestikta barak liu akontese iha Oe-Cusse kompara ho distritu sira seluk. Tanba ne'e husu ba Tribunál atu aplika pena tuir artigu 145 KP.

Enkuantu Defeza haktuir katak arguidu deklara deit faktus ne'ebé nia komete, arrepende ona nia hahalok no promete sei la komete tan krime hasoru lezada iha futuru. Tanba ne'e husu ba Tribunál aplika pena ne'ebé adekua ba arguidu tuir nia sala.

Desizaun

Tribunál konklui katak arguidu provadu komete krime hasoru lezada no kondena arguidu ho pena prizaun tinan 1 suspende ba tinan 2 no selu kustu judisial US\$30.00.

2. Krime ofensa ba integridade fizika simples

Nú. Prosesu : 0012/17.PDOSC
Kompozisaun Tribunál : Singulár
Juis : Dr. João Ribeiro
Prokurador : Dr. Mateus Nesi
Defeza : Dr. Marcelino Marques Coro
Tipu pena : Pena multa

Iha 09 Novembru 2017, Tribunál Distritál Oe-Cusse prezide julgamentu leitura sentensa ba krime ofensa ba integridade fizika simples ne'ebé envolve arguidu Ananias da Silva Colo (Membro PNTL) hasoru lezadu Joao Lelan, iha Suku Costa, Sub-distritu Pante-makassar, Distritu Oe-Cusse.

Akuzasaun Prokurador

Prokurador akuza katak iha 28 Abril 2017, maizumenus iha tuku 17:30 lokraik, arguidu dada sai lezadu husi uma laran ba liur, riba lezadu ba rai no sama dala 1 iha lezadu nia ulun rezulta lezadu sofre moras to'o desmaia. Kazu ne'e akontese wainhira lezadu ho viziñu diskuti malu no arguidu atu ba sori netik.

Ministériu Públiku akuza arguidu kontra artigu 145 KP kona-ba ofensa ba integridade fizika simples ho moldura penal too tinan 3 ka multa.

Produsaun ba prova

Iha julgamentu arguidu konfesa faktus hotu iha akuzasaun, arrepende ona nia hahalok no promete sei la komete tan krime hasoru lezadu iha futuru. Iha parte seluk lezadu kontinua konfirma faktus sira iha akuzasaun.

Desizaun

Tribunál konsidera katak arguidu provadu komete krime hasoru lezadu tuir faktus husi akuzasaun Prokuradór nian no kondena arguidu ho pena multa US\$150.00 no sei selu US\$1.00 kada loron durante loron 150. Tribunál mós fixa pena alternative durante loron 100 prizaun, wainhira arguidu lakumpri pena multa ne'e.

3. Krime omisídiu negligente

Nú. Prosesu : 0026/16.OESTR
Kompozisaun Tribunál : Singulár
Juis : Dr. João Ribeiro
Prokuradór : Dr. Mateus Nessi
Defeza : Dr. Marcelino Marques Coro
Tipu pena : Absolve

Iha 09 Novembru 2017, Tribunál Distritál Oe-Cusse prezide julgamentu leitura sentensa ba krime omisídiu negligente ne'ebé envolve arguidu Joaquim Sila hasoru lezadu Antonio Ulan, iha Suku Usitaqueno, Sub-distritu Oesilo, Distritu Oe-Cusse.

Akuzasaun Prokuradór

Prokuradór akuza katak iha 26 Novembru 2016, maizumenus iha tuku 11.00 dader, arguidu lori kareta baskolante tula tali tahan no akar husi Oemolo atu hatun iha Hauana. Wainhira to'o iha mercadu Tono ajudante nain 2 inklui lezadu sosa tua sabu aqua bo'ot 1 no hemu iha kareta leten. Depoizde hatun tiha tali tahan arguidu haruka lezadu ne'ebé tu'ur hela iha kareta nia besi leten atu bele tu'ur fali iha kareta laran parte kotuk, maibé lezadu lakohi. Arguidu kontinua ba hatun akar iha patraun nia uma, maibé foin mak aranka to'o iha subida arguidu hare lezadu monu husi kareta leten no taka rabat ba rai no rezulta lezadu mate fatin.

Prokuradór akuza arguidu kontra artigu 140 Kódigu Penál kona-ba krime omisídiu negligente ho moldura penal to'o tinan 4 ka multa.

Produsaun ba prova

Iha julgamentu, arguidu konfesa no rekoñese faktus sira ne'ebé deskreve iha akuzasaun Prokuradór. Arguidu mós deklara katak depoizde akontesementu ne'e arguidu lori kedas lezadu ba ospital maibé la konsege salva lezadu nia vida, tanba lezadu mate kedas iha fatin akontesementu. Arguidu mós partisipa iha seremonia funerál no apoiu material no depoizde proseus funerál no arguidu fó tan karau 5 inklui osan US\$300.00 ba lezadu nia feen ho familia no depois ne'e sira halo kedas akordu dame no kada fulan arguidu ho patraun sei fó tan fós saku 1 ho osan US\$25.00.

Testemuña Madalena Elu nu'udar lezadu nia feen depoimenta katak loos duni sira dame malu ona no arguidu fó ona karau 5 inklui osan US\$300.00.

Alegasaun finál

Prokuradór haktuir katak arguidu konfesa faktus hotu iha akuzasaun no krime ne'e akontese duni, tuir lolos arguidu hatene hela lezadu lanu maibé arguidu rasik lahatene oinsa atu proteje lezadu husi kondisaun refere. Tanba ne'e husu ba Tribunál atu tetu no husu ba arguidu atu fó indemnizasaun ba lezadu nia feen ho osan US\$5,000.00 no kondena arguidu tuir pena ne'ebé hakerek ona iha artigu 140 KP.

Enkuantu Defeza haktuir katak arguidu nia hahalok ne'e priense duni krime omisídiu negligente maibé arguidu laiha intensaun atu oho lezadu tanba antes ne'e arguidu fó hatene lezadu atu tun hosi kareta nia besi leten hodi tu'ur fali iha kareta laran, maibé lezadu la halo-tuir. Arguidu mós konfesa no arrepende ona ba nia hahalok hatudu nia kolaborasaun diak ho Tribunál. Tanba ne'e husu ba Tribunál atu aplika indeminizasaun tuir arguidu nia kbit no kondena arguidu ho pena ne'ebé kman. Maibé se Tribunál iha hanoin seluk husu atu fó justisa ba arguidu.

Desizaun

Depoizde avalia faktu sira prodús durante julgamentu, Tribunál fó konsiderasaun ba arguidu nia deklarasaun antes katak arguidu aviza ona ba lezadu atu tun husi kareta nia besi leten no tama tuur iha laran. Maibé lezadu ignora no nafatin tuur iha besi leten no faktus ne'e komfirma mós husi ajudante nain 2 seluk ne'ebé hamutuk ho lezadu iha kareta kotuk. Tanba ne'e Tribunál konklui prosesu ne'e no absolve arguidu hosi krime ne'ebé alega hasoru arguidu.

4. Krime kondusaun sein karta

Nú. Prosesu	: 0026/17.OESTR
Kompozisaun Tribunál	: Singulár
Juis	: Dr. João Ribeiro
Prokuradór	: Dr. Mateus Nesi
Defeza	: Dr. Marcelino Marques Coro
Tipu pena	: Pena multa

Iha 10 Novembru 2017, Tribunál Distritál Oe-Cusse prezide julgamentu leitura sentensa ba krime kondusaun sein karta ne'ebé envolve arguidu Francisco Oben hasoru Estadu Timor-Leste, iha Suku Costa, Sub-distritu Pante-makassar, Distritu Oe-Cusse.

Akuzasaun Prokuradór

Prokuradór akuza katak iha 23 Juñu 2017, maizumenus iha tuku 14:30 lokraik, arguidu lori motor iha dalan públiku hosi Padimau atu ba Mahata. Wainhira polisia pasa revista no hetan katak arguidu laiha karta kondusaun.

Prokuradór akuza arguidu kontra artigu 207 Kódigu Penál kona-ba krime kondusaun sein karta ho moldura penál too tinan 2 ka multa.

Produsaun ba prova

Iha julgamentu arguidu konfesa faktus hotu iha akuzasaun no deklara katak arrepende ona nia hahalok no foin primeira-vez mai hatan iha Tribunál.

Prokuradór husu ba Tribunál atu prezinde testemuña nia depoimentu ne'ebé antes ne'e Prokuradór arola ona atu rona tanba arguidu konfesa faktus hotu iha akuzasaun.

Alegasaun final

Prokuradór haktuir katak arguidu provadu komete krime kondusaun sein karta, tanba arguidu konfesa faktus hotu iha akuzasaun no kada fulan kazu ne'e sempre akontese no rejista aas iha Rejiaun Oe-Cusse. Tanba ne'e husu ba Tribunál aplika pena multa ba arguidu tuir artigu 207 KP.

Enkuantu Defeza haktuir katak arguidu konfesa faktus hotu iha akuzasaun, arrepende ona nia hahalok no arguidu servisu nu'udar agrikultór no laiha rendimentu fiksi kada fulan no iha oan nain 1. Tanba ne'e husu ba Tribunál aplika pena ne'ebé kmaan ba arguidu tuir nia sala.

Desizaun

Bazeia ba faktus sira ne'ebé produs durante julgamentu, Tribunál konklui prosesu ne'e no kondena arguidu ho pena multa US\$60.00 no sei selu kada lora 0.50 sentavus durante lora 120. Tribunál mós fiksa pena alternativa durante lora 80 prizaun, wainhira arguidu la kumpri pena multa ne'e.

5. Krime ofensa ba integridade física simples

Nú. Prosesu : 0034/17.OESIC
Kompozisaun Tribunál : Singulár
Juis : Dr. João Ribeiro
Prokuradór : Dr. Mateus Nesi
Defeza : Dr. Calisto Tout
Tipu pena : Omologa pedidu dezisténsia keixa

Iha 10 Novembru 2017, Tribunál Distritál Oe-Cusse prezide julgamentu tentativa konsiliaun ba krime ofensa ba integridade física simples ne'ebé envolve arguidu João Baptista dos Santos Almeida hasoru lezadu Eusebio Jesus de Almeida, iha Suku Costa, Sub-distritu Pante-makassar, Distritu Oe-Cusse.

Akuzasaun Prokuradór

Prokuradór akuza katak iha 24 Feveireiru 2017, maizumenus iha tuku 10.30 dader, arguidu lori ai-sar tuda dala 1 iha lezadu nia kelen sorin karuk no lori sepatu tuda iha lezadu nia kotuk laran. Arguidu kontinua tebe dala 1 iha lezadu nia kotuk laran no rezulta lezadu sofre moras. Kazu akontese wainhira arguidu ne'ebé nu'udar lezadu nia aman kiik husu ajuda lezadu atu fera ai, maibé lezadu lakohi, tanba ne'e arguidu komete aktu ne'e hasoru lezadu.

Prokuradór akuza arguidu kontra artigu 145 Kódigu Penál kona-ba krime ofensa ba integridade física simples ho moldura penál too tinan 3 ka multa.

Produsaun ba prova

Bazeia ba artigu 262 Kódigu Prosesu Penál kona-ba tentativa ba konsiliaun, antes tama ba produsaun ba prova, juis husu atu halo tentativa konsiliaun ba arguidu no lezadu.

Iha prosesu konsiliaun ne'e, lezadu hakarak dame ho arguidu, tanba ne'e lezadu husu ba Tribunál atu deziste ninia keixa hasoru arguidu.

Alegasaun final

Prokuradór no Defeza apresia akordu dame ne'ebé parte rua decide ona no husu ba Tribunál atu omologa prosesu ne'e.

Desizaun

Bazeia ba akordu hosi parte rua no pedidu dezisténsia keixa hosi lezadu, nune'e Tribunál konklui prosesu ne'e omologa akordu dame entre parte sira.

6. Krime ofensa ba integridade fízika simples

Nú. Prosesu : 0023/17.OEPMK
Kompozisaun Tribunál : Singulár
Juis : Dr. João Ribeiro
Prokuradór : Dr. Mateus Nesi
Defeza : Dr. Marcelino Marques Coro
Tipu pena : Absolve

Iha 10 Novembru 2017, Tribunál Distritál Oe-Cusse prezide julgamentu leitura sentensa ba krime ofensa ba integridade fízika simples ne'ebé envolve arguidu Padrisio Obe hasoru lezadu Michael Teme, iha Suku Costa, Sub-distritu Pante-makassar, Distritu Oe-Cusse.

Akuzasaun Prokuradór

Prokuradór akuza katak iha 13 Maiu 2017, maizumenus iha tuku 17.00 lokraik, arguidu dudu lezadu monu ba rai, rasta lezadu husi uma laran sai to'o liur no rezulta kanek kois iha lezadu nia liman sikun sorin loos no ain-tuur loos. Kazu ne'e akontese wainhira lezadu ba iha arguidu nia feen kiik nia uma no hateten katak arguidu lakohi hola ona nia feen kiik, tanba arguidu nia feen kiik iha ona laen.

Prokuradór akuza arguidu kontra artigu 145 Kódigu Penál kona-ba ofensa ba integridade fízika simples ho moldura penál bele to'o tinan 3 ka multa.

Produsaun prova

Iha julgamentu, arguidu deklara katak faktus iha akuzasaun ne'e laloos, tanba arguidu la dudu no la rasta lezadu ba rai. Arguidu mós deklara katak foin primeira-vez mai hatan iha Tribunál. Arguidu servisu hanesan agrikultór no laiha rendimentu kada fulan no iha oan nain 1.

Iha parte seluk, lezadu mós konfirma ho deklarasaun arguidu nian katak arguidu la rasta no la dudu lezadu monu lezadu ba rai hanesan saida mak deskreve iha akuzasaun.

Alegasaun final

Prokuradór haktuir katak faktus ne'ebé hakerek iha akuzasaun no produs durante iha audensia julgamentu la hatudu prova ruma tanba laiha indisius forte katak arguidu provadu komete krime hasoru lezadu. Tanba ne'e husu ba Tribunál atu absolve arguidu husi krime ne'e.

Aleinde ne'e Defeza mós haktuir katak, bazeia ba deklarasaun arguidu nian ne'ebé reforsa mós hosi lezadu katak arguidu komete krime hasoru lezadu. Tanba ne'e husu ba Tribunál atu absolve arguidu

Desizaun

Depoide avalia faktus provadu sira ne'ebé prodús durante julgamentu, Tribunál konsidera katak iha prova sufisiente atu kondena arguidu. Tanba ne'e Tribunál konklui prosesu ne'e no absolve arguidu.

7. Krime ofensa ba integridade fízika simples ho natureza violénsia doméstika

Nú. Prosesu : 0120/17.OESIC
Kompozisaun Tribunál : Singulár
Juis : Dr. João Ribeiro
Prokuradór : Dr. Mateus Nesi
Defeza : Dr. Marcelino Marques Coro
Tipu pena : Pena prizaun fulan 6 no suspende ba tinan 1

Iha 14 Novembru 2017, Tribunál Distritál Oe-Cusse prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu JL hasoru nia feen, iha Distritu Oe-Cusse.

Akuzasaun Prokuradór

Prokuradór akuza katak iha 14 Juñu 2017, maizumenus iha tuku 18.00 lokraik, arguidu basa dala 1 iha lezada nia hasan loos no basa dala 1 iha lezada nia hasan karuk no rezulta lezada sofre moras iha hasan karuk no loos. Kazu ne'e anexa mós ho relatóriu médiku husi Pradet no fotografia husi Polisia-VPU.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3 no artigu 35 letra (b) LKVD.

Produsaun ba prova

Iha julgamentu, arguidu konfesa faktus hotu iha akuzasaun, arguidu mós deklara katak arrepende ona nia hahalok, servisu hanesan agrikultór no laiha rendimentu fixu no arguidu iha oan nain 6.

Prokuradór husu ba Tribunál atu prezinde lezada nia deklarasaun ne'ebé antes ne'e Prokuradór arola ona atu rona tanba arguidu konfesa faktus hotu iha akuzasaun.

Alegasaun final

Prokuradór konsidera arguidu provadu komete krime hasoru lezada. Prokuradór mós konsidera katak kazu violénsia doméstika barak liu akontese iha Oe-Cusse kompara ho distritu sira seluk. Tanba ne'e husu ba Tribunál atu kondena arguidu tuir pena ne'ebé hakerek ona iha artigu 145 KP.

Enkuantu Defeza haktuir katak arguidu konfesa faktus hotu iha akuzasaun, arrepende ona nia hahalok. Tanba ne'e husu ba Tribunál atu aplika pena ne'ebé kmaan ba arguidu tuir nia sala.

Desizaun

Tribunál prova katak arguidu komete duni krime tuir faktus husi akuzasaun Prokuradór no konklui prosesu ne'e no kondena arguidu ho pena prizaun fulan 6 suspende ba tinan 1.

8. Krime ofensa korporál resíproka

Nú. Prosesu : 0014/17.OEPMK
Kompozisaun Tribunál : Singulár
Juis : Dr. João Ribeiro
Prokuradór : Dr. Mateus Nesi
Defeza : Dr. Calisto Tout
Tipu pena : Absolve

Iha 14 Novembru 2017, Tribunál Distritál Oe-Cusse prezide julgamentu leitura sentensa ba krime ofensa ba integridade fízika simples ne'ebé envolve arguidu Cipriano Eco hasoru lezadu Angelo Beno Eco, iha Suku Naimeco, Sub-distritu Pante-makassar, Distritu Oe-Cusse.

Akuzasaun Prokuradór

Prokuradór akuza katak iha 09 April 2017, maizumenus iha tuku 17.00 lokraik, arguidu lori ai-pedasuk baku dala 1 iha lezadu nia oin, tebe dala 1 iha kotuk laran no tebe dala 1 iha lezadu nia kanotak no rezulta lezadu sofre moras iha kotuk laran no bubu iha oin. Aktu hirak-ne'e anexa mós ho relatóriu médiku husi Ospital Referral Oe-Cusse no fotografia husi Polisia. Kazu ne'e akontese tanba hadau malu kona-ba rai eransa.

Prokuradór akuza arguidu kontra artigu 145 Kódigu Penál kona-ba ofensa ba integridade fízika simples ho moldura Penál to'o tinan 3 ka multa.

Produsaun ba prova

Bazeia ba artigu 262 Kódigu Prosesu Penál kona-ba tentativa ba konsiliaun, antes tama ba produsaun ba prova, juis husu atu halo tentativa konsiliaun ba arguidu no lezadu.

Iha prosesu konsiliaun ne'e lezadu hakarak dame ho arguidu ho kondisaun katak arguidu tenke fo fali osan US\$150.00 ba lezadu, maibé arguidu la konkorda ho pedidu ne'e, tanba ne'e lezadu hakarak kontinua julgamentu ne'e.

Iha julgamentu, arguidu deklara katak iha akontesementu ne'e lezadu mak tuku uluk dala 1 iha arguidu nia hasan loos, tanba ne'e arguidu komete aktu ne'e hasoru lezadu. Arguidu mós deklara katak arrende ona nia hahalok no servisu hanesan agrikultór no laiha rendimentu fiksi no iha oan nain 2 no seidauk dame malu ho lezadu.

Aleinde ne'e lezadu mós konfirma no reforsa tan fikus hotu iha akuzasaun, lezadu deklara katak iha akontesementu ne'e lezadu mak tuku uluk arguidu.

Alegasaun final

Depoisde rona tiha deklarasaun arguidu no lezadu nian, Prokuradór konsidera katak aktu ne'e la priense elementu husi krime ofensa ba integridade fízika simples, maibé konsidera nu'udar krime ofensa korporál resíproka tanba arguidu ho lezadu baku malu no bele mós hanesan legitima

defeza tanba lezadu mak tuku uluk arguidu. Tanba ne'e husu ba Tribunál atu absolve arguidu husi krime refere.

Defeza mós konkorda ho alegasaun Prokuradór nian no husu atu halo alterasaun juridiku ba krime ne'e hosi ofensa ba integridade fízika simples ba fali ofensa korporál resíproka. Tanba lezadu mak baku uluk arguidu no husu ba Tribunál atu absolve arguidu hosi krime ne'e.

Desizaun

Depoizde avalia faktus provadu sira ne'ebé produs durante julgamentu, Tribunál halo alterasaun juridiku husi artigu 145 KP kona-ba krime ofensa ba integridade fízika simples ba fali artigu 151 KP kona-ba ofensa korporál resíproka no konklui prosesu ne'e no absolve arguidu.

9. Krime kondusaun sein karta

Nú. Prosesu	: 0035/17.OESTR
Kompozisaun Tribunál	: Singulár
Juis	: Dr. João Ribeiro
Prokuradór	: Dr. Mateus Nesi
Defeza	: Dr. Marcelino Marques Coro
Tipu pena	: Pene multa

Iha 14 Novembru 2017, Tribunál Distritál Oe-Cusse prezide julgamentu leitura sentensa ba krime kondusaun sein karta ne'ebé envolve arguidu Nicolau Cabral hasoru Estadu RDTL, iha Suku Costa, Sub-distritu Pante-makassar, Distritu Oe-Cusse.

Akuzasaun Prokuradór

Prokuradór akuza katak iha 27 Jullu 2017, maizumenus iha tuku 10:00 dader, arguidu lori motor iha dalan públiku husi área Palaban nian. Wainhira polisia pasa-revista no hetan katak arguidu laiha karta kondusaun.

Prokuradór akuza arguidu kontra artigu 207 Kódigu Penál kona-ba krime kondusaun sein karta ho moldura penál too tinan 2 ka multa.

Produsaun ba prova

Iha julgamentu arguidu konfesa faktus hotu iha akuzasaun, arguidu mós deklara katak arrepende ona nia hahalok no foin primeira-vez mai hatan iha Tribunál. Arguidu hatutan tan katak hahalok hanesan ne'e ladiak no kontra lei Timor no arguidu hanesan agrikultór no laiha rendimentu fiksi.

Prokuradór husu ba Tribunál atu prezinde testemuña nia depoimentu ne'ebé antes ne'e Prokuradór arola ona atu rona tanba arguidu konfesa faktus hotu iha akuzasaun.

Alegasaun finál

Prokuradór haktuir katak arguidu provadu komete krime kondusaun sein karta, tanba arguidu konfesa faktus hotu iha akuzasaun no kada fulan kazu ne'e sempre rejista aas iha Rejiaun Oe-Cusse. Tanba ne'e husu ba Tribunál aplika pena multa ba arguidu bazeia ba artigu 207 KP.

Enkuantu Defeza haktuir tan katak arguidu konfesa faktus hotu iha akuzasaun, arrepende ona nia hahalok no arguidu hanesan agrikultór laiha rendimentu. Tanba ne'e husu ba Tribunál aplika pena ne'ebé kmaan ba arguidu tuir nia sala.

Desizaun

Bazeia ba faktus sira ne'ebé produs durante julgamentu, Tribunál konklui prosesu ne'e no kondena arguidu ho pena multa US\$60.00 no sei selu kada loron 0.50 sentavus durante loron 120. Tribunál mós fiksa pena alternativa durante loron 80 prizaun, wainhira arguidu la kumpri pena multa ne'e.

10. Krime ofensa ba integridade fízika simples ho natureza violénsia doméstika

Nú. Prosesu : 0109/17.OESIC
Kompozisaun Tribunál : Singulár
Juis : Dr. João Ribeiro
Prokuradór : Dr. Mateus Nesi
Defeza : Dr. Marcelino Marques Coro
Tipu pena : Pena prizaun tinan 1 suspende ba tinan 1

Iha 15 Novembru 2017, Tribunál Distritál Oe-Cusse prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu CB hasoru nia feen, iha Distritu Oe-Cusse.

Akuzasaun Prokuradór

Prokuradór akuza katak iha 03 Juñu 2017, maizumenus iha tuku 06:00 dadersan, arguidu lori ai-reo sanak 1 baku dala 1 iha lezada nia ulun, dala 1 iha kotuk laran no tebe dala 1 iha lezada nia kabun. Aktu hirak ne'e rezulta lezada sofre mean no moras. Kazu ne'e anexa mós ho relatóriu médiku husi Pradet no fotografía husi Polisia-VPU.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3 no artigu 35 letra (b) LKVD.

Produsaun ba prova

Iha julgamentu, arguidu konfesa faktus hotu iha akuzasaun, arguidu mós deklarara katak arrepende ona nia hahalok no foin primeira-ves mai hatan iha Tribunál no arguidu servisu hanesan agrikultór no laiha rendimentu fiksu. Arguidu promete katak iha futuru sei la komete tan krime hasoru lezada no ema seluk no diak malu ona ho lezada.

Prokuradór husu ba Tribunál atu prezinde lezada nia deklarasaun ne'ebé antes ne'e arola ona atu rona tanba arguidu rekoñese kona-ba faktus hotu iha akuzasaun.

Alegasaun final

Prokuradór konsidera arguidu provadu komete krime hasoru lezada, tanba arguidu konfesa faktus hotu iha akuzasaun no kazu violénsia doméstika barak liu akontese iha Rejiaun Oe-Cusse kompara ho distritu sira seluk. Tanba ne'e husu ba Tribunál atu aplika pena tuir artigu 145 KP.

Aleinde ne'e, Defeza haktuir tan katak arguidu konfesa faktus hotu iha akuzasaun, arrepende ona nia hahalok foin primeira-vez mai hatan iha Tribunál no promete katak sei la komete tan krime hasoru lezada iha futuro. Tanba ne'e husu ba Tribunál aplika pena ne'ebé adekua ba arguidu tuir nia hahalok.

Desizaun

Tribunál konsidera arguidu provadu komete krime hasoru lezada, bazeia ba konfisaun arguidu nian, Tribunál konklui prosesu ne'e no kondena arguidu ho pena prizaun tinan 1 suspende ba tinan 1.

11. Krime ofensa ba integridade física simples ho natureza violência doméstica

Nú. Prosesu : 0113/17.OESIC
Kompozisaun Tribunál : Singulár
Juis : Dr. João Ribeiro
Prokuradór : Dr. Mateus Nesi
Defeza : Dr. Marcelino Marques coro
Tipu pena : Pena prizaun tinan 2 suspende ba tinan 3

Iha 15 Novembru 2017, Tribunál Distritál Oe-Cusse prezide julgamentu leitura sentensa ba krime ofensa ba integridade física simples ho natureza violência doméstica ne'ebé envolve arguidu MN hasoru nia feen, iha Distritu Oe-Cusse.

Akuzasaun Prokuradór

Prokuradór akuza katak iha 06 Juñu 2017, maizumenus iha tuku 14:00 loraik, arguidu lori kapasete tuda dala 1 iha lezada nia ibun, dala 1 iha lezada nia kabaas parte loos no dala 1 kona iha lezada nia kelen parte loos no rezulta lezada sofre moras. Kazu ne'e anexa mós ho relatóriu médiku husi Pradet no fotografia husi Polisía-VPU.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa no konjuga ho artigu 2, 3 no artigu 35 letra (b) LKVD.

Produsaun prova

Iha julgamentu, arguidu konfesa faktus hotu iha akuzasaun, arguidu mós deklarata katak arrepende ona nia hahalok no promete katak sei la komete tan krime hasoru nia feen ka ema seluk iha futuro. Depoisde akontesementu ne'e arguidu diak malu kedas ho lezada.

Prokuradór husu ba Tribunál atu prezinde lezada nia deklarasaun ne'ebé antes ne'e rejista ona atu rona tanba arguidu konfesa faktus hotu iha akuzasaun.

Alegasaun final

Prokuradór konsidera arguidu provadu komete krime hasoru lezada no tuir loloos arguidu mak tenke proteje lezada nu'udar arguidu nia feen no laiha forsa atu halo reasaun hasoru arguidu. Prokuradór mós haktuir katak kazu violência doméstica barak liu akontese iha Rejiaun Oe-Cusse kompara ho distritu sira seluk. Tanba ne'e husu ba Tribunál atu aplika pena tuir artigu 145 KP.

Enkuantu Defeza haktuir katak arguidu konfesa faktus hotu iha akuzasaun, arrepende ona nia hahalok no kolabora ho Tribunál. Tanba ne'e husu ba Tribunál aplika pena ne'ebé adekuadu ba arguidu tuir nia sala.

Desizaun

Depoide avalia faktus provadu sira ne'ebé produs durante julgamentu, Tribunál konklui prosesu ne'e no kondena arguidu ho pena prizaun tinan 2 no suspende ba tinan 3.

12. Krime ofensa ba integridade física simples ho natureza violência doméstica

Nú. Prosesu : 0118/17.OESIC
Kompozisaun Tribunál : Singulár
Juis : Dr. João Ribeiro
Prokuradór : Dr. Mateus Nesi
Defeza : Dr. Marcelino Marques Coro
Tipu pena : Pena prizaun tinan 2 suspende ba tinan 2

Iha 16 Novembru 2017, Tribunál Distritál Oe-Cusse prezide julgamentu leitura sentensa ba krime ofensa ba integridade física simples ho natureza violência doméstica ne'ebé envolve arguidu FM hasoru nia feen, iha Distritu Oe-Cusse.

Akuzasaun Prokuradór

Prokuradór akuza katak iha 15 Maiu 2017, maizumenus iha tuku 08:00 dader, arguidu lori sapatu botas tuda dala lezada no kona iha lezada nia kanuruk, kabaas parte loos no rezulta bubu metan no moras. Depoide akontesementu ne'e lezada sente tauk no trauma halai sai husi uma no ba hela iha lezada nia oan fetu nia uma. Kazu ne'e anexa mós ho relatóriu médiku husi Pradet no fotografia husi Polisia-VPU.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa no konjuga ho artigu 2, 3 no artigu 35 letra (b) LKVD.

Produsaun ba prova

Iha julgamentu arguidu konfesa faktus hotu iha akuzasaun, arrepende ona nia hahalok, foin primeira-vez mai hatan iha Tribunál no promete sei la komete tan krime hasoru lezada no ema seluk iha futuru no iha oan nain 8.

Prokuradór husu ba Tribunál atu prezinde lezada nia deklarasaun ne'ebé antes ne'e rejista ona atu rona tanba arguidu konfesa faktus hotu iha akuzasaun.

Alegasaun final

Prokuradór konsidera arguidu provadu komete krime hasoru lezada. Aleinde ne'e Prokuradór subliña katak kazu violência doméstica barak liu akontese iha Rejiaun Oe-Cusse kompara ho distritu sira seluk. Tanba ne'e husu ba Tribunál atu aplika pena tuir artigu 145 KP.

Defeza haktuir katak arguidu iha kolaborasaun diak ho Tribunál no konfesa faktus hotu iha akuzasaun, arrepende ona nia hahalok, foin primeira-vez mai hatan iha Tribunál no promete ona

katak sei la komete tan krime hasoru lezada no ema seluk iha futuru. Tanba ne'e husu ba Tribunál aplika pena ne'ebé justu ba arguidu tuir nia sala.

Desizaun

Bazeia ba aktu hirak ne'e hotu, Tribunál konklui prosesu ne'e no kondena arguidu ho pena prizaun tinan 2 no suspende ba tinan 2.

13. Krime ofensa ba integridade fízika simples ho natureza violénsia doméstika

Nú. Prosesu : 0111/17.OESIC
Kompozisaun Tribunál : Singulár
Juis : Dr. João Ribeiro
Prokuradór : Dr. Mateus Nesi
Defeza : Dr. Marcelino Marques Coro
Tipu pena : Pena prizaun tinan 1 suspende ba tinan 1

Iha 16 Novembru 2017, Tribunál Distritál Oe-Cusse prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu DA hasoru nia feen, iha Distritu Oe-Cusse.

Akuzasaun Prokuradór

Prokuradór akuza katak iha 03 Juñu 2017, maizumenus iha tuku 17:00 loraik, arguidu buti lezada nia kakorok, silu lezada nia liman fuan 2 parte karuk no rezulta metan no moras iha lezada nia kakorok no lezada nia liman naksalak. Kazu ne'e anexa mós ho relatóriu médiku husi Pradet no fotografia husi Polisia-VPU.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3 no artigu 35 letra (b) LKVD.

Produsaun ba prova

Arguidu konfesa faktus hotu iha akuzasaun no deklarara katak arrepende ona nia hahalok, foin primeira-vez mai hatan iha Tribunál, iha ona na'in 7 no promete sei la komete tan krime hasoru lezada iha futuru.

Prokuradór husu ba Tribunál atu prezinde lezada nia deklarasaun ne'ebé antes ne'e apresenta ona ba Tribunál atu rona ninia depoimentu tanba arguidu konfesa faktus hotu iha akuzasaun.

Alegasaun final

Prokuradór haktuir katak arguidu provadu komete krimi violénsia doméstika hasoru nia feen, tanba ne'e husu ba Tribunál atu aplika pena tuir artigu 145 KP.

Enkuantu Defeza haktuir katak arguidu konfesa faktus hotu iha akuzasaun, arrepende ona nia hahalok no foin premeira-ves mai hatan iha Tribunál no iha oan nain 7. Defeza haktuir tan katak arguidu ho lezada dame malu ona no agora dadaun hela hamutuk iha uma 1. Tanba ne'e husu ba Tribunál aplika pena ne'ebé adekuadu ba arguidu tuir nia sala.

Desizaun

Bazeia ba provas hirak ne'e hotu, Tribunál konklui prosesu ne'e no kondena arguidu ho pena prizaun tinan 1 suspende ba tinan 1 tanba provadu komete krime violénsia doméstika hasoru nia feen.

14. Krime ofensa ba integridade fízika simples ho natureza violénsia doméstika

Nú. Prosesu : 0022/17.OEBCN
Kompozisaun Tribunál : Singulár
Juis : Dr. João Ribeiro
Prokuradór : Dr. Mateus Nesi
Defeza : Dr. Marcelino Marques Coro
Tipu pena : Pena prizaun tinan1 suspende ba tinan 2

Iha 16 Novembru 2017, Tribunál Distritál Oe-Cusse prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu MM hasoru nia feen, iha Distritu Oe-Cusse.

Akuzasaun Prokuradór

Prokuradór akuza katak iha 26 Maiu 2017, maizumenus iha tuku 11:00 dader, arguidu basa dala 4 iha lezada nia hasan parte loos, tebe dala 1 iha hirus-matan no tuku dala 1 iha ulun no rezulta lezada sofre moras. Kazu ne'e anexa mós ho relatóriu médiku husi Pradet no fotografia husi Polisia-VPU.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3 no artigu 35 letra (b) LKVD.

Produsaun ba prova

Arguidu konfesa faktus hotu iha akuzasaun, arguidu mós deklara katak arrepende ona nia hahalok, no depoisde akontesementu ne'e diak malu kedas ho lezada no foin primeira-ves mai hatan iha Tribunál.

Prokuradór husu ba Tribunál atu prezinde lezada nia deklarasaun ne'ebé antes ne'e Prokuradór arola ona atu rona tanba arguidu konfesa faktus hotu iha akuzasaun.

Alegasaun finál

Prokuradór haktuir katak arguidu provadu komete krime violénsia doméstika hasoru nia feen tanba iha audensia arguidu rasik konfesa faktus hotu iha akuzasaun. Tanba ne'e husu ba Tribunál atu aplika pena tuir artigu 145 KP.

Enkuantu Defeza haktuir katak arguidu konfesa faktus hotu iha akuzasaun, arrepende ona nia hahalok no promete iha future sei la komete tan krime hasoru nia membru familia ka ema seluk no foin premeira-ves mai hatan iha Tribunál. Arguidu ho lezada mós dame malu ona no agora dadaun hela hamutuk iha uma 1. Tanba ne'e husu ba Tribunál aplika pena ne'ebé justu ba arguidu tuir nia hahalok.

Desizaun

Depoizde avalia faktus provadu sira ne'ebé produs durante julgamentu, Tribunál konklui prosesu ne'e no kondena arguidu ho pena prizaun tinan 1 suspende ba tinan 2.

15. Krime ofensa korporál resíproka

Nú. Prosesu : 0023/17.OEBCN
Kompozisaun Tribunál : Singulár
Juis : Dr. João Ribeiro
Prokuradór : Dr. Mateus Nesi
Defeza : Dr. Calisto Tout
Tipu pena : Omologa pedidu dezisténsia keixa

Iha 17 Novembru 2017, Tribunál Distritál Oe-Cusse prezide julgamentu tentativa konsiliaun ba krime ofensa korporál resíproka ne'ebé envolve arguidu Antonio Pinto hasoru nia alin Celestino Taec, iha Suku Usitaco, Sub-distritu Pante-makassar, Distritu Oe-Cusse.

Akuzasaun Prokuradór

Prokuradór akuza katak iha 27 Maiu 2017, maizumenus iha tuku 12:00 meiodia, arguidu tuku dala 1 iha lezadu nia tilun no lezadu tuku fila fali iha arguidu nia kotuk rezulta moras. Kazu ne'e akontese tanba hadau malu rai eransa inan-aman nian.

Prokuradór akuza arguidu kontra artigu 151 Kódigu Penál kona-ba krime ofensa korporál resíproka ho moldura Penál too tinan 2 ka multa.

Produsaun ba prova

Bazeia ba artigu 262 KPP kona-ba tentativa ba konsiliaun, antes tama ba julgamentu produsaun ba prova, juis husu atu halo tentativa konsiliaun ba arguidu no lezadu.

Iha prosesu konsiliaun ne'e, arguidu hakarak dame malu de'it no dada fali nia-keixa. Iha parte seluk arguidu deklar katak arrepnde ona nia hahalok no promete katak sei la repete tan hahalok hanesan iha futuro.

Alegasaun final

Prokuradór no Defeza apresia akordu dame ne'ebé parte rua decide ona no husu ba Tribunál atu omologa prosesu ne'e.

Desizaun

Bazeia ba akordu hosi parte rua no pedidu dezisténsia hosi lezadu, Tribunál konklui prosesu ne'e no omologa akordu dame entre parte sira.

16. Krime ofensa ba integridade física simples ho natureza violénsia doméstika

Nú. Prosesu : 0021/16.OEBCN
Kompozisaun Tribunál : Singulár
Juis : Dr. João Ribeiro
Prokuradór : Dr. Mateus Nesi
Defeza : Dr. Calisto Tout
Tipu pena : Pena admoestasaun

Iha 17 Novembru 2017, Tribunál Distritál Oe-Cusse prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu JM hasoru nia feen, iha Distritu Oe-Cusse.

Akuzasaun Prokuradór

Prokuradór akuza katak iha 10 Outubru 2016, maizumenus iha tuku 13.00 loraik, arguidu lori ai-sanak baku dala 2 iha lezada nia ulun no rezulta mean, bubu no moras iha lezada nia ulun. Kazu ne'e anexa mós ho relatóriu médiku husi Pradet no fotografia husi Polisia-VPU.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3 no artigu 35 letra (b) LKVD.

Produsaun ba prova

Arguidu konfesa faktus hotu iha akuzasaun, arguidu mós deklara katak arrepende ona nia hahalok, foin primeira-vez mai hatan iha Tribunal no servisu hanesan agrikultór, iha oan na'in 4 no laiha vensimentu fiksi..

Prokuradór husu ba Tribunál atu prezinde lezada nia dekalrasaun ne'ebé antes ne'e apresenta ona ba Tribunál atu rona ninia depoimentu tanba arguidu konfesa faktus hotu iha akuzasaun.

Alegasaun finál

Prokuradór haktuir katak arguidu provadu komete krime hasoru lezada bazeia ba arguidu nia konfisaun rasik ba faktus alegadu sira. Tanba ne'e husu ba Tribunál atu aplika pena tuir artigu 145 KP ho moldura penál bele to'o tinan 3 ka multa.

Defeza haktuir katak arguidu iha kolaborasaun diak ho Tribunál, arguidu rasik konfesa no arrepende ona nia hahalok no foin primeira-ves mai hatan iha Tribunál. Tanba ne'e husu ba Tribunál atu aplika pena ne'ebé kmaan atu loron seluk arguidu labele repete fali ninia hahalok ne'e hasoru nia feen.

Desizaun

Bazeia ba faktus hirak ne'e hotu, Tribunál konklui prosesu ne'e no kondena arguidu ho pena admoestasaun tanba Tribunál fiar katak arguidu katuas liu ona sei larepete fali hahalok ne'e iha futuro.

17. Krime ofensa ba integridade fízika simples ho natureza violénsia doméstika

Nú. Prosesu	: 0034/16.OEBCN
Kompozisaun Tribunál	: Singulár
Juis	: Dr. João Ribeiro
Prokuradór	: Dr. Mateus Nesi
Defeza	: Dr. Calisto Tout
Tipu pena	: Pena prizaun tinan 2 suspende ba tinan 3

Iha 17 Novembru 2017, Tribunál Distritál Oe-Cusse prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu SL hasoru nia feen, iha Distritu Oe-Cusse.

Akuzasaun Prokuradór

Prokuradór akuza katak iha 27 Novembru 2016, maizumenus iha tuku 09:00 dader, arguidu foti ai rohan baku dala 2 iha lezada nia kotuk laran, basa dala 4 iha hasan sorin karuk, buti dala 1 iha kakorok no rasta lezada hosi uma laran ba liur no rezulta lezada sofre moras. Kazu ne'e anexa mós ho relatóriu médiku husi Pradet no fotografia husi Polisía-VPU.

Antes ne'e, iha 26 Novembru 2016, maizumenus iha tuku 09:00 dader, arguidu basa dala 2 iha lezada nia hasan parte loos no sama dala 1 iha lezada nia kotuk laran no rezulta lezada sofre moras.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3 no artigu 35 letra (b) LKVD.

Produsaun ba prova

Iha julgamentu, arguidu deklara katak nia basa deit dala 2 la'os dala 4 no lasama iha lezada nia kotuk laran inklui la lori ai baku lezada, maibe ameasa deit lezada no rekoñese faktu sira seluk loos hotu. Arguidu konsiente katak baku ema bele kauza moras no aktu ne'e konstitui nu'udar krime no kontra lei. Arguidu promete katak sei la komete tan krime hasoru lezada ka ema seluk iha futuro. Depoisode akontesementu ne'e arguidu dame malu kedas ho lezada no foin primeira-ves mai hatan iha Tribunál no iha ona oan nain 3.

Iha parte seluk lezada kontinua konfirma no reforsa faktus hotu iha akuzasaun, lezada mós deklara katak diak malu ona ho arguidu.

Testmuña Martino Taec nu'udar arguidu nia apa bo'ot depoimenta katak testemuña la hatene problema refere, maibé hatene wainhira lezada derepente halai ba iha testemuña nia uma.

Testemuña Jacinta Eko nu'udar arguidu nia ama bo'ot depoimenta katak iha momentu ne'eba testemuña la hare arguidu iha uma.

Testemuña Florensa Taec nu'udar arguidu nia alin depoimenta katak testemuña lahare lezada maibé hare deit arguidu no la hatene kona-ba problema refere.

Alegasaun final

Prokuradór haktuir katak arguidu nega faktus balun iha akuzasaun, maibé lezada kontinua reforsa faktus hotu iha akuzasaun. Aleinde ne'e kazu violénsia doméstika barak liu akontese iha Rejiaun Oe-Cusse kompara ho distritu sira seluk. Tanba ne'e husu ba Tribunál atu aplika pena tuir artigu 145 KP atu nune'e iha futuro arguidu la komete tan krime seluk.

Defeza haktuir katak arguidu deklara deit faktus ne'ebé nia komete, arrepende ona nia hahalok, diak malu ona ho lezada no foin primeira-vez mai hatan iha Tribunál. Tanba ne'e husu ba Tribunál aplika pena ne'ebé adekuadu ba arguidu tuir nia hahalok.

Desizaun

Tribunál konsidera katak arguidu provadu komete krime hasoru lezada tuir faktus husi akuzasaun Prokuradór nian no kondena arguidu ho pena prizaun tinan 2 supende ba tinan 3.

18. Krime ameasa

Nú. Prosesu : 0042/17.OESIC
Kompozisaun Tribunál : Singulár
Juis : Dr. João Ribeiro
Prokuradór : Dr. Mateus Nesi
Defeza : Dr. Calisto Tout
Tipu pena : Omologa dezisténsia keixa

Iha 20 Novembru 2017, Tribunál Distritál Oe-Cusse prezide julgamentu tentativa konsiliaun ba krime ameasa ne'ebé envolve arguida Domingas Abi, Maria Tacub Obe, arguidu José Poto, Agostinho Bissa, hasoru lezada Adriana Bissa Colo, iha Suku Lelaufe, Sub-distritu Nitibe Distritu Oe-Cusse.

Akuzasaun Prokuradór

Prokuradór akuza katak iha 26 Feveireiru 2017, maizumenus iha tuku 14:00 lokraik, arguidu no arguida sira obriga lezada atu simu mane 1 ho inisiál CE, hodi hari uma kain ho lezada. Maibé lezada hateten ba arguidu no arguida sira katak nia sei eskola no wainhira remata ona eskola mak bele hola mane. Arguidu no arguida sira hateten katak se lezada lakohi simu mane ne'e lezada nia aman sei taa mate lezada. Arguidu no arguida sira nia liafuan ne'e prejudika lezada no halo lezada sente tauk no trauma.

Prokuradór akuza arguida no arguida sira kontra artigu 157 Kódigu Penál kona-ba krime ameasa ho moldura too tinan 2 ka multa.

Produsaun prova

Bazeia ba artigu 262 Kódigu Prosesu Penál kona-ba tentativa ba konsiliaun, antes tama ba produsaun ba prova, juis husu atu halo tentativa konsiliaun ba arguidu/a sira no lezada.

Iha prosesu konsiliaun ne'e, lezada hakarak dame ho arguidu/a sira tanba sira hela hamutuk no husu ba arguidu/a sira la repete tan hahalok hanesan hasoru lezada iha futuru. Arguidu/a sira konkorda ho pedidu ne'e no husu ba Tribunál atu dezisté ninia-keixa hasoru arguidu/a sira.

Alegasaun final

Prokuradór no Defeza apresia ho akordu dame ne'ebé parte rua deside ona no husu ba Tribunál atu omologa prosesu ne'e.

Desizaun

Bazeia ba pedidu dezisténsia husi lezada no akordu dame hosi parte sira, Tribunál konklui prosesu ne'e no omologa akordu no pedidu dezisténsia hosi parte sira.

19. Krime ofensa ba integridade física simples ho natureza violénsia doméstika

Nú. Prosesu : 0015/17.OEBCN
Kompozisaun Tribunál : Singulár
Juis : Dr. João Ribeiro
Prokuradór : Dr. Mateus Nesi
Defeza : Dr. Calisto Tout
Tipu pena : Pena admoestasaun

Iha 20 Novembru 2017, Tribunál Distritál Oe-Cusse prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu MA hasoru nia feen, Distritu Oe-Cusse.

Akuzasaun Prokuradór

Prokuradór akuza katak iha 07 Maiu 2017, maizumenus iha tuku 03.00 madrugada, arguidu basa dala 1 iha lezada nia hasan karuk no rezulta bubu no moras. Kazu ne'e anexa mós ho relatóriu médiku husi Pradet no fotografía husi Polisía-VPU.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3 no artigu 35 letra (b) LKVD.

Produsaun ba prova

Arguidu konfesa faktus hotu iha akuzasaun, arguidu mós deklara katak arrepende ona nia hahalok, foin primeira-vez komete krime no diak malu ona ho lezada. Arguidu iha oan nain 3 no laiha rendementu fiksi.

Prokuradór husu ba Tribunál atu prezinde lezada nia deklarasaun ne'ebé antes ne'e Prokuradór arola ona atu rona tanba arguidu konfesa faktus hotu iha akuzasaun.

Alegasaun finál

Prokuradór subliña katak mezmú arguidu di'ak malu ona ho lezada maibé arguidu provadu komete krime hasoru lezada. Tanba ne'e, atu halo prevensaun ba arguidu hodi la komete tan krime hasoru lezada, husu ba Tribunál atu aplika pena tuir artigu 145 KP.

Enkuantu, Defeza konsidera arguidu arrepende ona ninia hahalok no foin primeira-vez komete krime no di'ak malu ona ho lezada. Tanba ne'e husu ba Tribunál aplika pena ne'ebé adekua ba arguidu tuir nia sala.

Desizaun

Depoizide avalia faktus provadu sira ne'ebé prodús durante julgamentu, Tribunál konklui prosesu ne'e no kondena arguidu ho pena admoestasaun.

20. Krime ofensa ba integridade fízika simples ho natureza violénsia doméstika

Nú. Prosesu : 0019/17.OEBCN
Kompozisaun Tribunál : Singulár
Juis : Dr. João Ribeiro

Prokuradór : Dr. Mateus Nesi
Defeza : Dr. Marcelino Marques Coro
Tipu pena : Pena multa

Iha 21 Novembru 2017, Tribunál Distritál Oe-Cusse prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguida CT hasoru nia oan, iha Distritu Oe-Cusse.

Akuzasaun Prokuradór

Prokuradór akuza katak iha 19 Maiu 2017, maizumenus iha tuku iha 07:00 dader, arguida lori aisar-kesak futun 1 baku dala 1 iha lezada nia kelen sorin karuk no rezulta metan no moras. Arguida kontinua baku tan dala 1 iha lezada nia ibun leten no tebe dala 1 iha lezada nia hirus-matan no rezulta bubu no moras iha lezada nia ibun no lezada monu ba rai.

Prokuradór akuza arguida kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3 no artigu 35 letra (b) LKVD.

Produsaun ba prova

Iha julgamentu, arguida konfesa faktus hotu iha akuzasaun, arguida mós deklara katak arrepende ona nia hahalok no foin primeira-vez mai hatan iha Tribunál, depoisde akontesementu ne'e diak malu kedas ho lezada.

Prokuradór husu ba Tribunál atu prezinde lezada nia deklarasaun ne'ebé antes ne'e Prokuradór arola ona atu rona tanba arguida konfesa faktus hotu iha akuzasaun.

Alegasaun finál

Prokuradór haktuir katak arguida provadu komete krime hasoru nia oan rasik no kazu violénsia doméstika barak liu akontese iha Rejiaun Oe-cusse kompara ho distritu sira seluk. Tanba ne'e husu ba Tribunál atu aplika pena tuir artigu 145 KP.

Enkuantu Defeza haktuir katak arguida konfesa faktus hotu iha akuzasaun, arrepende ona nia hahalok, foin primeira-vez komete mai hatan iha Tribunál. Tanba ne'e husu ba Tribunál aplika pena ne'ebé kmaan ba arguida tuir nia sala.

Desizaun

Tribunál konklui prosesu ne'e no kondena arguida ho pena multa US\$45.00 no sei selu kada loron 0.50 sentavus durante loron 90. Tribunál mós fiksa pena alternativa durante loron 60 prizaun, wainhira arguida la kumpri pena multa ne'e.

21. Krime ofensa ba integridade fízika simples ho natureza violénsia doméstika

Nú. Prosesu : 0021/17.OEBCN
Kompozisaun Tribunál : Singulár
Juis : Dr. João Ribeiro
Prokuradór : Dr. Mateus Nesi
Defeza : Dr. Marcelino Marques Coro
Tipu pena : Pena prizaun fulan 6 suspende ba tinan 1

Iha 21 Maiu 2017, Tribunál Distritál Oe-Cusse prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu SS hasoru nia feen, iha Distritu Oe-Cusse.

Akuzasaun Prokuradór

Prokuradór akuza katak iha 22 Maiu 2017, maizumenus iha tuku 16:00 loraik, arguidu uza bebak baku dala 1 iha lezada nia ulun no rezulta bubu no moras.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa no konjuga ho artigu 2, 3 no artigu 35 letra (b) LKVD.

Produsaun ba prova

Arguidu konfesa faktus hotu iha akuzasaun, arguidu mós deklara katak arrepende ona nia hahalok no foin primeira-vez mai hatan iha Tribunál. Arguidu servisu hanesan agrikultór laiha rendimentu fiksi no iha oan nain 1.

Prokuradór husu ba Tribunál atu prezinde lezada nia deklarasaun ne'ebé antes ne'e Prokuradór arola ona atu rona tanba arguidu konfesa faktus hotu iha akuzasaun.

Alegasaun finál

Prokuradór haktuir katak arguidu konfesa faktus hotu iha akuzasaun, tanba ne'e konsidera arguidu provadu komete krime hasoru lezada no violénsia doméstika akontese regularmente iha Rejiaun Oe-Cusse kompara ho distritu sira seluk. Tanba ne'e husu ba Tribunál atu aplika pena tuir artigu 145 KP.

Defeza haktuir katak arguidu iha kolaborasaun diak ho Tribunál, konfesa faktus hotu iha akuzasaun, arrepende ona nia hahalok no foin primeira-vez mai hatan iha Tribunál. Tanba ne'e husu ba Tribunál aplika pena ne'ebé adekua ba arguidu tuir nia sala.

Desizaun

Depoide avalia faktus provadu sira ne'ebé produs durante julgamentu, Tribunál konklui prosesu ne'e no kondena arguidu ho pena prizaun fulan 6 suspende ba tinan 1.

22. Ofensas korprál resíproka

Nú. Prosesu	: 0013/17.OEBCN
Kompozisaun Tribunál	: Singulár
Juis	: Dr. João Ribeiro
Prokuradór	: Dr. Mateus Nesi
Defeza	: Dr. Marcelino Marques Coro
Tipu pena	: Omologa dezisténsia keixa

ha 21 Novembru 2017, Tribunál Distritál Oe-Cusse prezide julgamentu tentativa konsiliaun ba krime ofensa korporais resíproka ne'ebé envolve arguidu BS hasoru nia feen JC, iha Distritu Oe-Cusse.

Akuzasaun Prokuradór

Prokuradór akuza katak iha 27 Abril 2017, maizumenus iha tuku 11:00 dader, arguidu lori katana taa iha lezada nia liman fuan 3 parte karuk rezulta kanek kiik, ran, bubu no moras. Tanba ne'e lezada foti fatuk tuda arguidu no kona iha arguidu nia reen-toos rezulta kanek, ran, bubu no moras.

Prokuradór akuza arguidu kontra artigu 151 Kódigu Penál kona-ba ofensa korporal resíproka ho moldura penal tinan 2 prizaun ka multa.

Produsaun ba prova

Bazeia ba artigu 262 Kódigu Prosesu Penál kona-ba tentativa ba konsiliaun, antes tama ba produsaun ba prova, juis husu atu halo tentativa konsiliaun ba arguidu no lezadu.

Iha prosesu konsiliaun ne'e, lezada ho arguidu hakarak dame deit no lezada husu ba arguidu iha futuru la repete tan hahalok hanesan no arguidu konkorda ho pedidu ne'e. Tanba ne'e lezada husu ba Tribunál atu dezisté ninia-keixa hasoru aguidu.

Alegasaun final

Depoiz de rona tiha rezultadu konsiliaun hosi parte sira, Prokuradór no Defeza apresia ho akordu dame ne'ebé parte rua deside ona no husu ba Tribunál atu omologa prosesu ne'e.

Desizaun

Bazeia ba pedidu dezisténsia husi lezada no akordu dame hosi parte sira, Tribunál konklui prosesu ne'e no omologa akordu dame entre parte sira.

23. Krime ofensa ba integridade fízika simples ho natureza violénsia doméstika

Nú. Prosesu	: 0005/17.OEPSB
Kompozisaun Tribunál	: Singulár
Juis	: Dr. João Ribeiro
Prokuradór	: Dr. Mateus Nesi
Defeza	: Dr. Marcelino Marques Coro
Tipu pena	: Pena prizaun tinan1 suspende ba tinan 1

Iha 22 Novembru 2017, Tribunál Distritál Oe-Cusse prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu SQ hasoru nia feen, iha Distritu Oe-Cusse.

Akuzasaun Prokuradór

Prokuradór akuza katak iha 14 Feveireiru 2017, maizumenus iha tuku 18:00 loraik, arguidu tebe dala 1 iha lezada nia kanotak parte loos, dala 1 iha lezada nia knosen parte loos no rezulta lezada sofre moras. Kazu ne'e anexa mós ho relatóriu médiku husi Pradet no fotografia husi Polisia-VPU.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penal to'o tinan 3 ka multa no konjuga ho artigu 2, 3 no artigu 35 letra (b) LKVD.

Produsaun ba prova

Arguidu konfesa faktus hotu iha akuzasaun, deklara katak arrepende ona nia hahalok, foin primeira-vez mai hatan iha Tribunál no promete katak sei la komete tan krime hasoru lezada ka ema seluk iha futuru. Arguidu servisu hanesan funsionáriu públiku ho vensimentu kada fulan US\$222.00.

Prokuradór husu ba Tribunál atu prezinde lezada nia deklarasaun ne'ebé antes ne'e Prokuradór arola ona atu rona tanba arguidu konfesa faktus hotu iha akuzasaun.

Alegasaun finál

Prokuradór haktuir katak arguidu provadu komete krime hasoru lezada. Mezmu sira diak malu ona, maibé haree ba volume krime violénsia doméstika ne'ebé sempre aumenta hosi loron ba loron, husu ba Tribunál atu aplika pena tuir artigu 145 KP.

Defeza haktuir katak arguidu konfesa faktus hotu iha akuzasaun, arrepende nia hahalok, di'ak malu ona ho lezada no promete ona katak sei la komete tan krime hasoru lezada iha futuru. Bazeia ba sirkunstánsia hirak ne'e, husu ba Tribunál atu aplika pena ne'ebé adekuaudu ba arguidu.

Desizaun

Tribunál konsidera katak arguidu provadu komete duni krime hasoru lezada tuir faktus husi akuzasaun Prokuradór nian no kondena arguidu ho pena prizaun tinan 1 supende ba tinan 1.

24. Krime lahalo tuir obrigasaun alimentar

Nú. Prosesu	: 0018/17.PDOEC
Kompozisaun Tribunál	: Singulár
Juis	: Dr. João Ribeiro
Prokuradór	: Dr. Mateus Nesi
Defeza	: Dr. Marcelino Marques Coro
Tipu pena	: Omologa dezistencia keixa

Iha 23 Novembru 2017, Tribunál Distritál Oe-Cusse prezide julgamentu tentativa konsiliaun ba krime lahalo tuir obrigasaun alimentár ne'ebé envolve arguidu AP hasoru lezada EMGP, iha Distritu Oe-Cusse.

Akuzasaun Prokuradór

Prokuradór akuza katak iha 15 Feveireiru 2017, lezada lori sira nia oan sai husi uma ba hela fali ho lezada nia inan-aman, tanba arguidu sai husi sira nia uma durante fulan 1 lafila ba sira nia uma. Aktu ne'e prejudika teb-tebes lezada ho sira nia oan ne'ebé foin fulan 1.

Prokuradór akuza arguidu kontra artigu 225 Kódigu Penál kona-ba krime lahalo tuir obrigasaun alimentár ho moldura Penál too tinan 3 ka multa.

Produsaun prova

Bazeia ba artigu 262 Kódigu Prosesu Penál kona-ba tentativa ba konsiliaun, antes tama ba produsaun ba prova, juis husu atu halo tentativa konsiliaun ba arguidu no lezada.

Iha prosesu konsiliaun ne'e, arguidu rekoñese ninia oan maibé rejeita atu moris hamutuk ho lezada. Arguidu hakarak responsabiliza ba ninia oan no kada fulan sei fõ foos saku 1 ho osan US\$10.00 ba lezada. Lezada konkorda no husu ba Tribunál atu dezisté ninia-keixa hasoru arguidu.

Alegasaun final

Depoiz de rona tiha rezultadu konsiliaun hosi parte sira, Prokuradór no Defeza apresia ho akordu dame ne'ebé parte rua decide ona no husu ba Tribunál atu omologa prosesu ne'e.

Desizaun

Bazeia ba pedidu dezisténsia husi lezada no akordu dame hosi parte sira, Tribunál konklui prosesu ne'e no omologa akordu dame entre parte sira.

25. Krime kondusaun sein karta

Nú. Prosesu : 0027/17.OESTR
Kompozisaun Tribunál : Singulár
Juis : Dr. João Ribeiro
Prokuradór : Dr. Mateus Nesi
Defeza : Dr. Marcelino Marques Coro
Tipu pena : Pena multa

Iha 23 Novembru 2017, Tribunál Distritál Oe-Cusse prezide julgamentu leitura sentensa ba krime kondusaun sein karta ne'ebé envolve arguidu Mateus Olin hasoru Estadu RDTL, iha Suku Costa, Sub-distritu Pante-makassar Distritu Oe-Cusse.

Akuzasaun Prokuradór

Prokuradór akuza katak iha 13 Julu 2017, maizumenus iha tuku 15:00 lokraik, arguidu lori motor iha dalan públiku no la uza xapa matrikula iha área Oesono. Wainhira polisia pasa-revista no hetan katak arguidu laiha karta kondusaun.

Prokuradór akuza arguidu kontra artigu 207 Kódigu Penál kona-ba krime kondusaun sein karta ho moldura penál too tinan 2 ka multa.

Produsaun ba prova

Arguidu konfesa faktus hotu iha akuzasaun, arrepnde ona nia hahalok no foin primeira-vez mai hatan iha Tribunál. Arguidu konsiente katak hahalok hanesan ne'e ladiak no kontra lei Timor. Arguidu hanesan funsionáriu iha obras públiku ho vensimentu kada fulan US\$115.00, iha oan 1 no foin lori motor maizumenus fulan 6 ona.

Prokuradór husu ba Tribunál atu prezinde testemuña nia depoimentu ne'ebé antes ne'e Prokuradór arola ona atu rona tanba arguidu konfesa faktus hotu iha akuzasaun.

Alegasaun finál

Prokuradór haktuir katak arguidu provadu komete krime kondusaun sein karta tanba arguidu rasik konfesa faktus hotu iha akuzasaun. Prokuradór reforsa tan katak arguidu hatene lori motor fulan 6 ona maibé seidak iha karta kondusaun, signifika arguidu halo krime barak ona. Tanba ne'e husu ba Tribunál aplika pena multa ba arguidu bazeia ba artigu 207 KP.

Enkuantu Defeza haktuir katak arguidu konfesa faktus hotu iha akuzasaun, arrepende ona nia hahalok no foin primeira-vez mai hatan iha Tribunál. Tanba ne'e husu ba Tribunál aplika pena ne'ebé kmaan ba arguidu tuir nia sala.

Desizaun

Tribunál konklui prosesu ne'e no kondena arguidu ho pena multa US\$45.00 no sei selu 0.50 sentavus kada loron durante loron 90. Tribunál mós fiksa pena alternativa durante loron 60 prizaun, wainhira arguidu la kumpri pena multa ne'e.

26. Krime ofensa ba integridade física simples ho natureza violénsia doméstika

Nú. Prosesu	: 0100/17.OESIC
Kompozisaun Tribunál	: Singulár
Juis	: Dr. João Ribeiro
Prokuradór	: Dr. Mateus Nesi
Defeza	: Dr. Marcelino Marques Coro
Tipu pena	: Pena prizaun

Iha 24 Novembru 2017, Tribunál Distritál Oe-Cusse prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu HFS hasoru nia aman rasik SS, iha Suku Costa Sub-distritu Pante-makassar, Distritu Oe-Cusse.

Akuzasaun Prokuradór

Prokuradór akuza katak iha 21 Maiu 2017, maizumenus iha tuku 18.00 lokraik, arguidu tebe dala 1 iha lezadu nia kelen, arguidu foti besi kanu baku rahun meja masa 1 no kadeira masa 2 no rezulta lezadu monu ba rai. Kazu ne'e akontese wainhira lezadu fanu arguidu ne'ebé toba hela. Kazu ne'e anexa mós ho relatóriu médiku husi Pradet no fotografia husi Polisía-VPU.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa no konjuga ho artigu 2, 3 no artigu 35 letra (b) LKVD.

Produsaun prova

Iha julgamentu, arguidu uza nia direito nonok. Entretantu lezadu komfirma faktu hotu iha akuzasaun Prokuradór nian no deklarata katak sira hela hamutuk iha uma ida, dame malu ho arguidu no arguidu husu ona diskulpa ba lezadu.

Testémuña Filomena Tasain nu'udar arguidu nia inan depoimenta katak hakarak uza direito nonok tamba sira sei iha relasaun familia. Enkuantu testemuña Antonio Saba nu'udar arguidu nia alin uza direito nonok tanba sei iha relasaun familia.

Alegasaun final

Prokuradór haktuir katak mesmu arguidu uza nia direito nonok maibé lezadu konfirma faktus hotu iha akuzasaun, tanba ne'e Prokuradór konsidera arguidu provadu komete krime hasoru lezadu. Tanba ne'e husu ba Tribunál atu aplika pena tuir artigu 145 KP. Enkuantu Defeza husu ba Tribunál atu kondena arguidu ho pena ne'ebé adekuadu.

Desizaun

Tribunál kosidera krime ne'e akontese duni hasoru lezadu no Tribunál fiar liu ba lezadu nia deklarasaun mesmu iha julgamentu arguidu uza nia direito nonok. Tribunál mós prova faktus seluk bazeia ba relatóriu médiku no fotografia husi polisia no kondena arguidu ho pena prizaun fulan 6.

27. Krime ofensa ba integridade física simples ho natureza violência doméstica

Nú. Prosesu : 0095/17.OESIC
Kompozisaun Tribunál : Singulár
Juis : Dr. João Ribeiro
Prokuradór : Dr. Mateus Nesi
Defeza : Dr. Calistru Tout
Tipu pena : Pena prizaun tinan 2 suspende ba tinan 3

Iha 30 Novembru 2017, Tribunál Distritál Oe-Cusse prezide julgamentu leitura sentensa ba krime ofensa ba integridade física simples ho natureza violência doméstica ne'ebé envolve arguidu FdC hasoru nia feen, iha Distritu Oe-Cusse.

Akuzasaun Prokuradór

Prokuradór akuza katak iha 10 Maiu 2017, maizumenus iha tuku 21:00 kalan, arguidu basa dala 2 iha lezada nia hasan parte loos no rasta husi kama leten tun ba rai. Arguidu kontinua sama dala 1 iha lezada nia kanuruk, tuku dala 1 iha lezada nia ulun parte karuk no tuku dala 1 iha lezada nia reen-toos no tuku dala 1 iha hirus matan to'o lezada desmaia. Kazu ne'e anexa mós ho relatóriu médiku husi Pradet no fotografia husi Polisia-VPU.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa no konjuga ho artigu 2, 3 no artigu 35 letra (b) LKVD.

Produsaun ba prova

Iha julgamentu, arguidu konfesa faktus hotu iha akuzasaun no deklarata katak arrepende ona nia hahalok no promete sei la komete tan krime hasoru nia feen ka ema seluk iha futuru no laiha rendimentu fiksi.

Prokuradór husu ba Tribunál atu prezinde lezada nia deklarasaun ne'ebé antes ne'e Prokuradór arola ona atu rona tanba arguidu konfesa faktus hotu iha akuzasaun.

Alegasaun final

Prokuradór konsidera arguidu provadu komete krime violência doméstica no kazu violência doméstica barak liu akontese iha Rejiaun Oe-Cusse kompara ho distritu sira seluk. Tanba ne'e husu ba Tribunál atu aplika pena tuir artigu 145 KP.

Enkuantu Defeza haktuir katak arguidu konfesa faktus hotu iha akuzasaun, arrepende ona nia hahalok no promete iha futuru sei la komete tan krime hasoru lazada ka ema seluk. Tanba ne'e husu ba Tribunál aplika pena ne'ebé adekuadu ba arguidu tuir nia sala.

Desizaun

Tribunál konsidera katak arguidu provadu komete duni krime tuir faktus husi akuzasaun. Bazeia ba provas hirak-ne'e, Tribunál kondena arguidu ho pena prizaun tinan 2 suspende ba tinan 3.

28. Krime ofensa ba integridade fízika simples ho natureza violénsia doméstika

Nú. Prosesu : 0099/17.OESIC
Kompozisaun Tribunál : Singulár
Juis : Dr. João Ribeiro
Prokuradór : Dr. Mateus Nesi
Defeza : Dr. Marcelino Marques Coro
Tipu pena : Pena prizaun

Iha 30 Novembru 2017, Tribunál Distritál Oe-Cusse prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu FXS hasoru nia feen, iha Distritu Oe-Cusse.

Akuzasaun Prokuradór

Prokuradór akuza katak iha 25 Maiu 2017, arguidu rasta lezada husi kama leten sai ba liur no silu lezada nia liman parte karuk no rezulta lezada sofre moras. Kazu ne'e anexa mós ho relatóriu médiku husi Pradet no fotografia husi Polisía-VPU.

Aleinde ne'e, iha loron ida antes iha 24 Maiu 2017, maizumenus iha tuku 23:00 kalan, arguidu rasta lezada husi uma laran ba liur no sama iha lezada nia kotuk laran no rezulta lezada sofre moras.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3 no artigu 35 letra (b) LKVD.

Produsaun ba prova

Arguidu konfesa faktus hotu iha akuzasaun, arrepende ona nia hahalok no promete sei la komete tan krime hasoru lezada. Arguidu mós deklara ba Tribunál katak iha tinan 2015 arguidu hetan ona pena prizaun tinan 1 suspende ba tinan 2 no arguidu ho lezada seidauk dame malu tanba agora hela ketak-ketak. Arguidu iha oan nain 5 no arguidu servisu hanesan badaen no la iha rendimentu fiksi kada fulan.

Prokuradór husu ba Tribunál atu prezinde lezada nia deklraasaun ne'ebé antes ne'e Prokuradór arola ona atu rona tanba arguidu konfesa faktus hotu iha akuzasaun.

Alegasaun finál

Prokuradór haktuir katak arguidu konfesa faktus hotu iha akuzasaun no arguidu provadu komete krime violénsia doméstika. Prokurador reforsa tan katak arguidu laiha arrendementu mesmu

antes ne'e Tribunál kondena ona arguidu ho pena prizaun tinan 1 no suspende ba tinan 2. Tanba ne'e husu ba Tribunál atu aplika pena tuir artigu 145 KP.

Enkuantu Defeza haktuir katak arguidu konfesa faktus hotu iha akuzasaun, arrepende ona nia hahalok, mezmu arguidu ho lezada seidak diak malu, maibé arguidu sei nafatin fó tau matan ba nia oan sira. Tanba ne'e husu ba Tribunál aplika pena ne'ebé adekua ba arguidu tuir nia sala.

Desizaun

Depoide avalia faktus ne'ebé produs durante julgamentu, Tribunál konklui prosesu ne'e no kondena arguidu ho pena prizaun tinan 2. Tribunál konsidera katak arguidu provadu komete krime violénsia doméstika hasoru nia feen no la arrepende ba nia hahalok mesmu antes ne'e arguidu hetan ona pena prizaun ho suspensaun.

29. Krime ofensa ba integridade fízika simples

Nú. Prosesu : 0003/17.OESIC
Kompozisaun Tribunál : Singulár
Juis : Dr. João Ribeiro
Prokuradór : Dr. Mateus Nesi
Defeza : Dr. Calisto Tout
Tipu pena : Omologa dezisténsia keixa

Iha 30 Novembru 2017, Tribunál Distritál Oe-Cusse prezide julgamentu tentativa konsiliaun ba krime ofensa ba integridade fízika simples ne'ebé envolve arguidu Heronio Tasae (HT) ho Sebastioa Sila (SS) hasoru lezadu Joanino Obe, iha Suku Lelaufe, Sub-distritu Nitibe, Distritu Oe-Cusse.

Akuzasaun Prokuradór

Prokuradór akuza katak iha 10 Feveireiru 2017, maizumenus iha tuku 22:00 kalan, arguidu HT tuku dala 1 iha lezadu nia arguidu SS dada no basa dala 1 iha lezadu nia hasan karuk no rezulta lezadu sofre moras.

Prokuradór akuza arguidu nain rua kontra artigu 145 Kódigu Penál kona-ba ofensa ba integridade fízika simples ho moldura penál to'o tinan 3 ka multa.

Produsaun ba prova

Bazeia ba artigu 262 Kódigu Prosesu Penál kona-ba tentativa ba konsiliaun, antes tama ba produsaun ba prova, juis husu atu halo tentativa konsiliaun ba arguidu sira no lezadu.

Iha prosesu konsiliaun ne'e, lezadu hakarak dame malu de'it maibé ho kondisaun katak arguidu sira tenke fo indemnizasaun ba lezadu ho montante US\$150.00 no parte arguidu sira konkorda ho pedidu ne'e atu dame malu de'it ho lezadu. Aleinde ne'e, lezadu mós husu atu iha futuru arguidu sira labele repete tan sira nia hahalok ne'e no hosi parte arguidu sira konkorda. Tanba ne'e lezadu husu ba Tribunál atu dezisté ninia-keixa hasoru arguidu nain rua.

Alegasaun final

Depoisde rona tiha rezultadu konsiliasaun hosi parte sira, Prokuradór no Defeza apresia ho akordu dame ne'ebé parte rua deside ona no husu ba Tribunál atu omologa prosesu ne'e.

Desizaun

Bazeia ba pedidu dezisténsia husi lezadu no akordu dame hosi parte sira, Tribunál konklui prosesu ne'e no omologa akordu ne'e.

Atu hetan informasaun kompleitu, favor kontaktu:

Luis de Oliveira Sampaio
Diretór Ezekutivu JSMP
Diresaun e-mail: luis@jsmp.tl
Website: www.jsmp.tl